

pis adolescens, qui atrocissima subire tormenta maluit, quam integritatis pudicitiaque detrimentum facere, Episcopi item Adalbertus Pragensis Ruthenorum Apostolus, Bernardus Hildesiensis, Conradus Constantiensis, Dunstanus Cantuariensis, Heribertus Coloniensis, Lambertus Ultrajectensis, Oswaldus Vigorniensis; Sifenandus Compostellanus, Udalricus Augustanus, Wolfgangus Ratisbonensis, Elias & Quarinus Vallesiae comites & Episcopi: Romualdus ejusque discipuli Joannes, Benedictus & Bonifacius Imperatori Othoni III. sanguine junctus, Prussorum & Slavorum Apostolus, Berno, Odo, Ademar, Majolus & Odilo Abbates Cluniacenses &c.

Doctrina celebriores fuere Regino Abbas Prumiensis, Leo Imperator, *Sapiens* cognominatus, Simeon Metaphrastes, SS. Odo & Odilo, Atto Vercellensis Episcopus, Luitprandus Episcopus Cremonensis, cujus historiam Germanus quidam scriptor anonymus continuasse videtur &c.

10. Num hoc quoque seculum illustratum est miraculis?

Hæc nec isto, nec alio unquam seculo defuere. 1. Dynasta quidam dæmoniacus ex Othonis M. comitatu Romæ solo vinculorum Petri contactu à stygio obsessore extemplo manumissus est. 2. In synodo Vintoniensi Christi è cruce pendentis effigies ad S. Dunstani preces pro Monachis probis contra improbos Clericos disertè loqui audita est. 3. SS. Udalricus, Conradus, Majolus, Nilus Abbas &c. claruere miraculis, quorum complura Regino & Frodoadus Abbas, alique litteris mandârunt.